

նովան այսպէս է պատմում Վենետիկից հեռացած հայ վարդապետների հաստատուելը Տրիէստում եւ իր կատարած դերը այս գործի մէջ\*):

«Վենետիկի Ինկուիզիցիայի քարտուղարը հաղորդեց Վենետիկի Տրիէստի հիւպատոսին, որ ես կարող եմ յուսալ Ինկուիզիտորների դատարանի շնորհքին (Վենետիկ վերադառնալու արտօնութեան), եթէ յաջողիմ հայ վարդապետների կարեւոր գործում, որը նա արտօնում է հիւպատոսին պատմել ինձ:

«Հիւպատոսը քառուրդ ժամում ներկայացրեց ինձ այդ գործը, եւ ես հէնց այն ժամանակ հասկացայ, որ ի զուր պիտի կորցնեմ իմ աշխատանքը, բայց եւ այնպէս վճռեցի փորձել:

«Չորս հայ վարդապետներ, այլեւս յոգնած իրենց վանահօր բռնութիւններից, փախել էին Վենետիկի Ս. Ղազար վանքից: Նրանք Պոլսում ունեն շատ հարուստ ազգականներ եւ ծաղրելով ծիրանակիր վանահօր կողմից իրենց վրայ դրուած բանադրանքը՝ գնացել են Վիեննա՝ խնդրելու համար ապաստարան ու հովանաւորութիւն եւ խոստանալով օգտակար լինել Աւստրիային իրենց հաշուին կառուցուելիք տըպարանով, որ հոգեւոր գրքեր պիտի մատակարարէ թուրքական կայսրութեան ընդարձակ դաւաններում գտնուող բոլոր հայ վանքերին: Նրանք պարտաւորուել են ծախսել մէկ միլիոն Փլորին մեծ տպարան հիմնելու եւ մի տուն գնելու կամ շինելու համար այնտեղ, որը կը հաճի իրենց տրամադրել Նորին կայսերական մեծութիւնը: Նրանք մտադիր են բնակուել այդ տան մէջ համայնքով, բայց առանց վանահայր ընտրելու: Ինչպէս եւ պէտք էր ենթադրել, Աւստրիական կառավարութիւնը չվարանեց գոհացնել նրանց խնդրանքը, եւ աւելին դեռ, տըւեց նրանց առանձնաշնորհումներ:

«Ոնդրին այն էր, որ Աւստրիական կառավարութիւնը ուզում էր Վենետիկից խլել առեւտրի այդ շահաւէտ ճիւղը եւ տեղափոխել Կայսրութեան սահմանները: Այդ պատճառով, Վիեննայի արքունիքը ուղղեց նրանց Տրիէստ, ուժգնորէն յանձնելով նրանց ծրագիրը նահան-

գապետի ուշադրութեան, եւ ուր նրանք արդէն վեց ամիս է որ գտնուում են:

«Վենետիկի Ինկուիզիտորները ջերմօրէն ցանկանում էին եւ որոշ չափով էլ յոյս ունէին վերադարձնել Վենետիկ: Առանց յաջողութեան դիմելով ուղիղ միջոցի՝ վանահայրը առաջարկեց համարեա լիովին բաւարարել նրանց ուղածը, ինկուիզիտորները փորձեցին բոլոր դադտնի միջոցներով արդելքներ յարուցանել նրանց առջեւ, որ ձեռք քաշեն Տրիէստից:

«Հիւպատոսը անկեղծօրէն ասաց ինձ, որ ինքը յանձն չէր առնի զբաղուել այդ գործով, որովհետեւ ամէն տեսակէտից նա թւում է իրեն անհնարին եւ նախադուշակից, որ եթէ ես յանձն առնեմ, ի զուր տեղը պիտի կորցնեմ բոլոր իմ ջանքերը: Ես այնքա՛ն զգում էի պատուարժան հիւպատոսի նախադուշակութեան ճիշդ լինելը, որ նոյնիսկ վճռականութիւն չունեցայ այդ բանն ասելու նրան: Ես խաղոյն հասկացայ, որ ամէն կերպ պէտք է խոյս տալ, որպէսզի այս բարձրաստիճան պաշտօնեան որեւէ կերպով չկասկածէ, թէ ես աշխատում եմ համոզել վարդապետներին, որ յետ կենան իրենց ծրագրից, որովհետեւ բացի Հանրապետութեան ծառայութեան կողմից իմ վրայ դրուած պարտականութիւններից՝ հիւպատոսը ողեւորուած էր մասնաւորապէս Տրիէստի առեւտրի ծաղիկումով, ուստի եւ քաջալերում ու աջակցում էր չորս վարդապետների ծրագրին:

«Չնայած դրան, զրդուած հայրենիքի կարօտից, ես ծանօթութիւն հաստատեցի վարդապետների հետ, այն պատրանքով, թէ կամեում եմ տեսնել նրանց ձուլած հայերէն տառերն ու Պոլսից վաճառքի համար ստացուած դանազան քարերն ու մետաղները: Ութը թէ տասը օրուան մէջ ես շատ մտերմացայ նրանց հետ: Մի անգամ ես նրանց ասացի, թէ՛ եթէ խնդրը միայն բանադրանքից ազատուելն է, նրանց արժանագատուութիւնը պահանջում է վերադառնալ ու հնազանդութիւն յայտնել իրենց վանահօր, որին նրանք երգում են տուել:

«Վարդապետներից ամենէն յամառը պատասխանեց ինձ, թէ վանահայրը պահելով իրեն որպէս բռնակալ եւ ոչ որպէս Հայր՝ առաջինն ինքը խախտեց այն կապը, որ փոխադարձաբար ստեղծուած էր իրենց միջեւ: Իսկ ինչ

\*) Casanova, Memoires, Edition Garnier Freres. Paris Vol. VIII, p. p. 371-374: